


Cassian Beer-Jacomet, Landquart



G.B. Vigelgia Nadal, avon ch'ei catschi dis, ha igl aungel dalla mort fatg viseta a Landquart tier Cassian Beer. La sgarscheivla malsogna, il reps, ha terminau gliez di la destrucziun dil tgierp d'in um plein possa. Per nus restonts anavos ha il Cassian stuii bandunar memia baul quest mund. Aunc grond basegns vessen ils affons giu dil bab, denton va la veglia dil Segner meinsvart tut autras vias che nossa voluntad. Per dunna ed affons eisi stau grevs dis da malencurada – dasperas la splendur dil pigniel da Nadal. Gie, da far si il pigniel da Nadal, quei giavisch veva il moribund bein giu zacons dis avon. Aschia ha el sepruau – tochen il davos – da dar cura-scha als ses mitigond lur dolurs vengnents entras ils radis legreivels dalla fiasta da Nadal. Finfatg saveva e senteva il moribund ch'ei mondi ruc a ruc alla fin, ed el era beinpreparaus per quei davos viadi. Cheu ei cardient-scha profunda semanifestada, e quella ha il trapassau giu trasatras. Biabein in onn ei il Cassian staus sclavinaus dalla malsogna, ed el ha purtau il buordi dil destin cun admirabla pazienza e curascha nunballucconta. Cura ch'il miedi ha rapportau eis el buca semess abandun ni ha forza lamentau. Anzi, el ei sefidaus sin la voluntad beinvulenta dil Segner sco era sigl agid medicinal, dond aschia curascha e sustegn als ses. Gest sco quei ch'il Cassian era da giuven stgis e cantlis per scadina furbaria e narradad, aschia eis el buca senuspius d'acceptar e purtar la crusch ch'il Segner veva mess ad el a dies. In stendiu orn ora ha el fatg affrunt alla malsogna per aschia ver peda da sepreparar el senn cristian sin la mort. Viu aschia ei la malsogna forse era stada in benefeci pil defunct.

Affonza e famiglia

Gliez di cura che Cassian ei naschius, ils 13 d'uost 1932, ha il fravi Clau Antoni bein schau ruassar in mument il marti e la massa. Sco secund affon d'ina famiglia da 9 affons ha il trapassau saviu passentar in'affonza emplenida da plaschers e travaglias quotidianas. Gronda premura han ils geniturs mussau per l'educaziun cristiana, ina educaziun praticada senza risguards e stgisas. Al Cassian ha quell'educaziun adina dau pli tard la caparra da surmuntar ils fastedis e las cruschs da mintga di.

Igl onn 1965 ei Cassian sespusaus cun la giuvna Tresa Jacomet da Mumpé-Tujetsch. Da quella lètg ein sorti ina buoba e dus buobs, la luschezia dils geniturs, cunzun dil bab. Savens risdava il Cassian dil progress ch'ils affons fetschien en scola ed egl emprendissadi, e gest en quella fasa dalla veta e scolaziun vessen els aunc giu basegns dil bab. Nus tuts sperein, ch'il Segner detti alla dunna ed als affons la forza da surmuntar la sperdita dil car bab.

Il fravi

Il giuven plein forza e vitalitad era sco predestinaus per il mistregn da fravi. Strusch finida la scola, ha il Cassian dau 'pietigot' als geniturs e fargliuns ed ei serendius a Soloturn. Leu ha el fatg e terminau igl emprendissadi da fravi da carrs e cavals cun distincziun. Silsuenter tuorna el a casa e lavura ella fatschenta cul bab – biabein 15 onns. Ch'el seigi staus in bien fravi, da gliez dattan tons e tons garters-finistra ed auter perdetga. Pli tard ha el fatg il fagot ed ei s'engaschaus tier pliras fatschentas el contuorn ed a Cuera. Sia davosa staziun da lavur ei sepresentada a Landquart sco pedeld'ina fatschenta. Quella lavur onz pli leva veva el priu muort las difficultads cul dies sgurdinau.

Il musicant

La veta culturala da Cassian san ins buca mesirar culla curtauna gronda. Denton, leu nua ch'el ei s'engaschaus ha el fatg la lavur cun grond anim. Gliez san ins dir, musicant eis el staus in lu nuota mo aschia. La scolaziun musicala ha el fatg a Soloturn duront igl emprendissadi. Leu ha el aunc sunau zacons onns ella musica dil marcau. Quella scolaziun fundamentala ha bastau al Cassian per entrar ella musica militara. Da gliez temps lu nuota mo ina cagna. Turnaus el vitg natal, entra el ladinamein ella musica da Sedrun. Cheu vegnan ins beinspert pertscharts dallas qualitats dil musi-

cant giuven. El vegn engaschaus sco vice-dirigent, e sco tal ha el d'instruir ils novs musicants. Lura emprendevan ins da sunar pér suenter che las scolas eran terminadas. In brav diember musicants tuatschins ha il Cassian instruii, ed il scribent da questas linguas seregorda aunc bein, co quels marschavan la sera ni la dumengia suentermiezdi entuorn la meisa-stiva. Pli tard fuss il Cassian bugen daven-taus dirigent dalla musica, e las habilitads vess el finfatg giu leutier, denton el fuva mo in fravi ... Mudergiau ha quei allura el tanientamein, ch'el ha pendiu siu agen instrument sin clavella ed ei ius per siu fatg.

Il caluster

Onns ora ei il Cassian staus in caluster incarnau. A Sedrun eis el segidaus vid quella lavur culs geniturs pressapauc ogt onns. Cheu era el egl element. Ins savess finfatg scriver in tschuat surdallas furbarias ch'el ha giu fatg en teshamber ni ella vischinonza.

Igl onn 1982 – suenter ver giu frequentau il cuors da caluster a Nossadun-naun – surpren il Cassian igl uffeci da caluster dalla baselgia catolica a Landquart. Cun veseivel plascher fa el quella lavur e segida tiel survetsch divin, dond maun leu nua ch'ei fa basegns. Ils calusters grischuns renconuschan quella bunaveglia cun eleger lur commember sco cassier da lur suprastonza. Il quen da 1986 sa il moribund surdar alla suprastonza 10 dis avon che la mort splunti – sia davos lavur per il cuminesser.

Ils 27 da december pren ina gronda famiglia da parents, amigts ed enconus-chents cumiau dil Cassian a Landquart. Els han buca schau stermentar dil diatsch, mitgiert cun neiv tochen ella bassa, per cumpignar il trapassau sil davos viadi. Car frar, Tiu viadi sin tiara ei ussa alla fin, tut pitir ed endirar ei vargau. Il Segner detti a Ti il ruaus perpeten. Nus tuts, Tia cara famiglia, la mumma ed ils fargliuns sco era amigts ed enconuscents salvein Tei en buna memoria.